



LAS SCHIBETTAS DAL MAIS

da Patrick Capaul

OASIS «DON'T BELIEVE THE TRUTH»

...vus legais endretg! L' emprim tip per quest mais èn ils frars Gallagher da Manchester UK....

OASIS èn enavos cun in album che nagin n'avess propi spetgà, els èn ina band ch'ì na drova ozendi strusch pli. OASIS tutgan schon bunamain in zic tar il fier vegl... DENTANT è l'album numer sis da las buccas largias englesas la definitiva emanzipaziun dals Beatles! Zwar tunan OASIS quella gia in pau pli fitg suenter ils Stones, las chanzuns n'han era betg pli la forza da lur debut, dentant, èn OASIS ussa finalmain OASIS!



LAIN FABULAR «ILS BEATLES PER RUMANTSCH»

Premiera! Per l'emprima giada preschent jau a vus musica rumantscha en las Punts! E per esser sincers, hai jau già grev da morder tochen che jau hai decidì per quest album....

Album da cover n'è nagut nov, covers dals Beatles èn uschi vegls sco ils Beatles sasez, rock rumantsch tutga bod en il museum – dentant, ils Beatles per rumantsch, gliez è ina vera sensaziun! Schon bunamain uschi sensaziunal

sco la invenziun dal mini-tschitschapuorla per sin viadi!

Qua s'ha ella pia missa ensemen, la petta elitara dal ver ed oriund rock'n'roll rumantsch - ina prisa Hades sin in schadun pin ba-rock, turschè cun duas buccadas Tartaruga e trais scadiolas soundcheck da la pura da Rueun City. E schon bunamain è ella finida, la petta fabulöööosa....bunamain vess jau emblidà la decoraziun en furma da stailas che na glischan betg rumantsch! Uss è ella finida! La pli chara petta che la rumantschia musicala ha vesì tochen en perpettan! E co tuna ella? Compliment Thomas Cathomen a.k.a. Tartaruga! Tia versiun da «strawberry fields» tutga la guotta sin il chau, Ringo e Paul vessan sunà bugen batteria e bass tar tia producziun! Per quella prestaziun surdess jau gugent desch stailas a ti

E per il rest – John e George vegnissan a rotar en fossa!



THE WHITE STRIPES «GET BEHIND ME SATAN»

Darar ha in duo musical fatg tanta canera ed en il medem mument scrit uschi bler uschi buna musica! Meg e Jack White, fardgliuns ch'èn maridà e schon puspè spartgids; els dus han sdremas alvas sin tut quai ch'è cotschen, ed exact uschi simpla e clara tuna era la musica da quest duo da Detroit! THE WHITE STRIPES portan enavos la dretga musica en il martgà che sa numna Rock City.

Lur sesavel album en sis onns cuntinuescha la via en lur tut agens fastitgs, è anc ina prisa pli agen, pli schregs, pli rockigs, pli bluesigs, schizunt pli souligs....

THE WHITE STRIPES - In duo cun in sound uschi schäbig e miserabel ch'ì fa tut mal las ureglias, e tuttina, la musica davos tut quella canera è uschi gronda che la canera para dad esser surda!

